

A. Ω.

HISTORIÆ ROMULI

PROŒMIUM.



Taliam aureo seculo cœpisse, sub Principibus Diis, Jano Cameſe, & Saturno, (à quibus etiam modò Janicula^p modò Cameſena, modò Saturnia; à Gentilibus verò Saleombrona dicitur) Gente Phœnice & Sagâ, quæ post inundationem terrarum, prima per orbem colonias miserit, autor est *M. Porcius Cato in fragm. Orig. p. m. 7. 59.* Consentit *Q. Fabius Piſtor*, qui *lib. 1. p. m. 68.* Imperium Italiae in aureo Seculo ad Janum refert, sed cultores terræ indigitat Thuscicos; quamvis ille *pag. 70.* quoque scribat, circa finem aurei seculi, primum omnium Ninum, Regem Assyriorum, bella finitimis movisse, & totius Asiae populos perdomuisse, sub quo etiam Cameſen præfectum fuisse Aboriginibus. Et paulopost; *Fremetibus undique contra se armis, toto prius pererrato orbe, Saturnus ad Janum se contulit. Eum comi hospitio Janus receptum Latio & Aboriginibus præfecit.* Verùm, uti de primis Italiae incolis maximè dissentiunt Autores, aliis Tyrrhenos fuisse, credentibus, (*Myrsilo Lesbio de Orig. Ital. autore, qui expresse scribit: Tyrrheni se solos indigenas in Italiâ existimant, atque à vetustissimi Dei sui, quem Janum Vadymona vocant, filio Razenua nominant. - - Producent quoque suæ vetustatis vestigia multa, ut Deos, ritus, mores, literas, leges. Quæ profecto omnia congruunt his, quæ probatioribus Græci Historici tradunt. Scribunt enim solos Tyrrhenos in Italiâ vetustissimos esse, qui neque ab aliis pendeant origine, neque ut ceteri conveniunt & advena, sed propriâ regione esse oriundos.*) Aliis Aborigines primos Italiae cultores fuisse, statuentibus, utpote qui propter antiquitatem, & quod in regione suâ genuinâ, absque origine, & veluti è terrâ nati h. e. indigenæ fuerint, dicti sint Aborigines & ἀυτοχθονες: Cum quibus plures conveniunt, quàm cum Myrsilo in Tyrrhenis. *V. Justinus lib. 43. cap. 1. §. 3. Dionysius Halicarnassæus, qui fusè de his agit lib. 1. Antiqu. Rom. cap. 9. 10, 11, 12, 13, 14. seq.* Ita ex adverso ferè omnes, tam Græci, quam Latini Scriptores consentiunt, primum in Italiâ, & quidem apud hos Abo-